

## sukan



Pelajar UMP tidak melepaskan peluang keemasan menimba ilmu daripada Razif.

# Razif bimbing 50 pelajar UMP

Oleh Faizatul  
Farhana Farush Khan  
bhvarsiti@bh.com.my

## ► Kuantan

Seramai 50 pelajar Universiti Malaysia Pahang (UMP) tidak melepaskan peluang keemasan menimba ilmu daripada Datuk Razif Sidek melalui Kem Motivasi dan Klinik Badminton 'The Route to be World Champion', baru-baru ini.

Program sehari di Kompleks Sukan UMP menyaksikan bekas jaguh beregu negara itu berkongsi rahsia kejayaannya melonjakkan nama Malaysia hingga ke gelanggang antarabangsa suatu ketika dahulu.

Ketua Pusat Sukan

dan Kebudayaan (PSK) UMP, Abd Rahman Safie, berkata Razif yang turut membarisi pasukan tanah air menjulang Piala Thomas pada tahun 1992, memiliki idea, pandangan, nasihat, semangat dan kemahiran amat bernilai untuk dicurahkan kepada generasi pelapis.

"Program ini membolehkan pelajar bertemu dengan beliau yang diiktiraf sebagai antara ikon badminton negara, sekali gus memperoleh tip dan teknik untuk berjaya dalam sukan diceburi," katanya.

### Berkat usaha berterusan

Sementara itu, Razif berkata, kejayaan dicapai beliau dan adik-beradiknya dalam arena badminton adalah berkat usaha

berterusan, selain sokongan kuat keluarga.

"Setiap individu yang menceburi bidang sukan perlu sentiasa gigih berlatih dan berbincang dengan jurulatih untuk mengetahui prestasi diri menghadapi perlawanan kerana ini akan membuatkan atlet fokus," katanya.

Peserta dari Fakulti Teknologi Kejuruteraan, Ng Pui Xin, 22, berkata tunjuk ajar diberikan oleh Razif menyuntik dorongan untuk berkecimpung lebih serius dalam sukan badminton yang diminati sejak zaman persekolahan.

"Beliau memberikan banyak tip penting, termasuk cara memegang raket dengan betul untuk membuat pukulan yang baik," katanya.



Razif (kiri) memberikan tunjuk ajar dan tip penting menguasai sukan badminton.

## info

### Datuk Razif Sidek

- Dilahirkan pada 29 Mei 1962 di Banting, Selangor.
- Panggilan dalam kalangan ahli keluarga dan teman rapat ialah Ajib
- Bekas pemain beregu negara
- Membarisi skuad Malaysia yang menamatkan penantian 25 tahun menjulang Piala Thomas dengan menewaskan Indonesia 3-2 pada tahun 1992
- Gandungan dengan Jalani pernah dinobatkan sebagai antara empat beregu terbaik dunia
- Melakar sejarah memenangi pingat gangsa melalui acara beregu bersama Datuk Jalani Sidek pada temasya Sukan Olimpik di Barcelona pada tahun 1992
- Bekas jurulatih kebangsaan